

Skýrsla stjórnar Ský fyrir starfsárið 2015-2016

Flutt á aðalfundi félagsins 25. febrúar 2016
47. starfsári að ljúka

Eins og undarfarin ár hefur nýliðið starfsár Ský verið viðburðaríkt og félaginu til sóma. Markmið Ský eru sem fyrr að halda úti öflugri og faglegri starfsemi á sviði upplýsingatækni, m.a. með ráðstefnuhaldi og fræðslustarfsemi.

Á árinu tókst stjórn, faghópum og framkvæmdastjóra að uppfylla þessi markmið og halda áfram því góða starfi sem unnið hefur verið síðustu ár. Eftir fækkun á árunum fyrir 2011 hefur fjölgað jafnt og þétt í félaginu. Annað árið í röð bættust rúmlega 100 félagar í hópinn og eru félagsmenn því orðnir 1093 og hafa aldrei verið fleiri. Stefnan síðasta ár var að bæta áfram í hópinn og ná eitt þúsundasta félagsmanninum á líðandi starfsári og gekk það eftir. Tengslanet Ský (félagsmenn + póstlisti) hefur samhliða þessu stækkað ár frá ári og hefur frá á 2009 meira en tvöfaldast. Ekki nóg með að náðst hafi að brjóta þúsund féлага múrinn þá náðist einnig að klifra upp fyrir fimm þúsund í tengslanetinu en þar eru nú 5052 skráði.

Stjórn Ský á starfsárinu 2015-2016

Guðjón Karl Arnarson, formaður
Sigrún Gunnarsdóttir, varaformaður
Guðmundur Arnar Þórðarson, gjaldkeri
Helga Dögg Björgvinsdóttir, ritari
Þorvarður Kári Ólafsson, meðstjórnandi
Ólafur Tr. Þorsteinsson, meðstjórnandi
Snæbjörn I. Ingólfsson, meðstjórnandi

Stjórnin hélt 11 bókaða stjórnarfundum auk nokkurra vinnufunda bæði innan stjórnar, með nefndum félagsins og tengdum aðilum af ýmsu tilefni.

Ráðstefnur og fundir

Félagið stóð fyrir 23 atburðum á árinu, sem er einum færri en á fyrra ári en þá voru þeir 24. Viðburðirnir í ár hafa flestir verið fjölmennari en í fyrra. Faghópar voru virkir við ráðstefnu- og fundahöld. Yfirlit yfir viðburði er að finna á vefsíðunni www.sky.is undir „Liðnir atburðir“.

Í ár var UTMessan hinn glæsilegasti viðburður og má Ský vera stolt af því að standa að slíkum viðburði. UTMessan var haldin í samstarfi við Háskóla Íslands, Háskólann í Reykjavík, Samtök iðnaðarins og Platínium samstarfsaðila. Tilgangur UTMessunnar er að vekja athygli á mikilvægi upplýsingatækninnar og áhrif hennar á einstaklinga, fyrirtæki og íslenskt samfélag. Markmiðið er að sjá marktæka fjölgun nemenda sem velja sér tæknigreinar sem svið í háskólum landsins. Einnig viljum við tengja upplýsingatæknina betur við skólastarf og atvinnulíf og vekja áhuga almennings á upplýsingatækni og mikilvægi hennar á öllum sviðum daglegs lífs. Viðburðurinn var gífurlega vel sóttur, rúmlega þúsund manns voru í Hörpu á föstudeginum þegar ráðstefnuhluti UTMessunnar fór fram og nálægt 10 þúsund manns mættu á laugardeginum þegar sýning opin almenningi fór fram.

UT verðlaun Ský

Frá árinu 2010 hefur Ský veitt árlega Upplýsingatækniverðlaun Ský. Um er að ræða heiðursverðlaun að danskri fyrirmynd fyrir framlag til upplýsingatækni á Íslandi. Reglur verðlaunanna kveða á um að verðlaunað sé framtak sem þegar hafi sannað sig og því er ekki um sprota- eða hugmyndaverðlaun að ræða. Að þessu sinni hlaut Skúli Eggert Þórðarson og embætti Ríkisskattstjóra UT verðlaunin. Að verðlauna þau afrek sem unnin hafa verið hjá embætti ríkisskattstjóra undanfarin ár er ekki hægt án þess að nefna Skúla Eggert Þórðarson í sömu andrá. Þess vegna var tekin sú ákvörðun að veita UT-verðlaunin til Skúla sem persónu og einnig embættinu sem slíku. Meðal þess sem kemur fram í rökstuðningi dómnefndar er að árið 1999 opnaði Ríkisskattstjóri á rafræn skil, árið 2008 komu sjálfkrafa inn upplýsingar frá fjármálastofnunum, útbúinn var veflykill sem var undanfari rafrænna skilríkja og árið 2010 þurfti rúmlega helmingur framteljenda engu að breyta í framtalinu.

Tímaritið Tölvumál, ritnefnd og siðanefnd

Ritnefnd hélt allmarga fundi á liðnu ári og veglegt eintak af Tölvumálum kom út í byrjun nóvember. Efnistöð blaðsins í ár var „hönnun og endurhönnun á hugbúnaði“. Blaðið var sent til félagsmanna Ský og einnig var því dreift á UTmessunni til gesta og gangandi. Vefútgáfa Tölvumála má finna á vef Ský (www.sky.is) og sífellt má sjá aukningu í lestri þar. Ritnefnd hefur undanfarin ár unnið glæsilegt starf en sífelld vöntun er á fleira fólki til þess að taka upp pennann (eða í okkar tilfelli lykklaborðið) og rita greinar.

Siðanefnd hefur ekki starfað á vegum Ský síðustu starfsár en vilji er til að koma henni af stað aftur og óskum við eftir félagsmönnum sem áhuga hafa á málefnum að gefa sig fram.

Faghópar

Á liðandi starfsári fjölgaði í nánast öllum hópum og flestir bættu við sig meira en tuttugu. Í dag eru einungis tveir hópar sem ná ekki 100 meðlimum. Hástökkvari ársins annað árið í röð er faghópur um vefstjórnun en þar fjölgaði félögum um 54. Einungis einn félagi vantar til þess að hópurinn hafi 200 félagi. Tveir aðrir hópar hafa dafnað sérstaklega vel á árinu. Í faghópi um rekstur tölvukerfa fjölgaði um 39 og í faghópi um menntun, fræðslu og fræðistörfum í UT fjölgaði um 35 en honum er nú 88 meðlimir en þeir voru 32 fyrir tveimur árum.

Starf faghópanna var á liðandi ári jafn glæsilegt og áður. Þeirri venju hefur verið fylgt að hver faghópur sjái um að minnsta kosti einn stærri viðburð á vegum Ský á ári og svo var einnig í ár.

Faghópar Ský á starfsárinu eru:

- Fókus, faghópur um upplýsingatækni í heilbrigðisþjónustu, félagar 106 en voru 99.
- Öldungadeild, félagar héldust í 56.
- Fjarskiptahópur, félagar 110 en voru 102.
- Öryggishópur, félagar 125 en voru 102.
- Faghópur um rafræna opinber þjónustu, félagar 122 en voru 100.
- Faghópur um vefstjórnun, félagar 199 en voru 154.
- Faghópur um hugbúnaðargerð, félagar 123 en voru 97.
- Faghópur um rekstur tölvukerfa, félagar 113 en voru 74.
- Faghópur um menntun, fræðslu og fræðistörfum í UT, félagar 88 en voru 53.

Starf faghópanna er mikilvægur hlekkur í starfsemi félagsins og aldrei að vita nema fleiri faghópar líti dagsins ljós í nánustu framtíð.

Ritun sögu tölvuvæðingar

Haustið 2014 voru liðin 50 ár síðan fyrsta tölvan kom til Íslands að því tilefni átti Öldungadeild Ský frumkvæði að því að hafist yrði handa við að rita sögu tölvuvæðingar á Ísland. Ritun sögunnar hélt áfram á árinu Anna Ólafsdóttir Björnsson tók við ritun af Þorgrími Gestssyni. Við viljum nýta tækifærið og þakka Þorgrími fyrir hans framlag. Í ritnefnd eru Arnlaugur Guðmundsson (formaður ritnefndar), Sigurður Bergsveinsson, Frosti Bergsson, Vilhjálmur Þorsteinsson, Gunnar Ingimundarson, Sigríður Olgeirsdóttir, Gísli Már Gíslason, Þorsteinn Hallgrímsson og Arnheiður Guðmundsdóttir. Búið er að ljúka fyrstu útgáfu af sögunni og verður hún sett upp á vef Ský á vordögum 2016. Einnig skilar rithöfundur af sér tilbúnu eintaki til prentunnar ef svo færi að sagan yrði einnig gefin út á prenti. Verkefnið er fjármagnað af styrkjum og þakkar félagið öllum þeim sem styrkja verkefnið.

Innlent samstarf

Skýrslutæknifélagið er aðili að fagráði Staðlaráðs Íslands í upplýsingatækni, FUT en á nú engan fulltrúa í stjórn og hefur sagt sig úr félaginu. Þá hefur félagið fulltrúa í stjórn Persónuverndar og hefur Sigrún Gunnarsdóttir verið þar fyrir hönd Ský. Félagið er einnig aðili að Icepro.

Erlent samstarf

Skýrslutæknifélag Íslands hefur um margra ára skeið tekið þátt í evrópsku samstarfi upplýsingatæknifélaga á vettvangi CEPIS (Council of European Professional Informatics Societies). Sú samvinna hélt áfram á síðastliðnu ári og erum við þátttakendur í verkefni sem felst í að hvetja konur til að fara í tölvutengt nám, ICT-Women task force og einnig ICT-Computing in Schools. Þar hefur sterklega komið fram að öll Evrópulöndin eru að glíma við að reyna að fá ungt fólk til að fara í tæknimiðað nám og sérstaklega ungar konur.

Ský var til margra ára aðili að International Federation of Information Processing (IFIP), alþjóðasamtökum skýrslutæknifélaga, en hefur ekki verið virkur félagi síðustu árin vegna breyttra reglna hjá IFIP. Nokkrir félagsmenn Ský eru þó fulltrúar í IFIP.

18. apríl hélt CEPIS sinn 54. Council meeting á Íslandi, þangað mættu 34 aðilar. Á meðal gesta voru 4 aðilar frá Ský.

Bebras

Stjórn Ský ákvað að taka boði sem barst í framhaldi af Cepis Council fundinum í apríl að vera með í alþjóðlegu verkefni sem heitir BEBRAS. Framkvæmdastjóri Ský fór fyrir hönd félagsins í vinnubúðir í maí þar sem búnar voru til þrautir til að nota í Bebras áskoruninni 2015.

Vikuna 9. – 13. nóvember stóð Ský fyrir Bebras áskorun á meðal barna á aldrinum 10-18 ára. Þetta verkefni hefur breiðst hratt út og var Ísland nú með í fyrsta skipti. 14 skólar tóku þátt og alls 476 krakkar. Það vekur sérstaka ánægju að kynjahlutfallið er nánast jafnt en 7 fleiri stelpur tóku þátt. Almenn ánægja var með áskorunina og vonir standa til að ennþá betur takist til á þessu ári. Stjórn Ský tók á starfsárinu formlega ákvörðun um að sækja um aðild að Bebras samfélaginu.

Afkoma félagsins

Eins og fram kemur í ársreikningi félagsins var afkoman á árinu mjög góð og skilar félagið hagnaði uppá 5,5 milljónir kr. en hagnaður var í fyrra rúmlega 8,2 milljónir kr. Hagnaðurinn var örlítill meiri en áætlanir gerðu ráð fyrir. Áhætta í rekstri hefur aukist töluvert með tilkomu viðburðar af stærðargráðu UTmessunar og því ánægjulegt að staða félagsins er orðin nægilega sterk til þess að gera brugðist við sveiflum. Það er

alls ekki markmið stjórnar að reka félagið með miklum hagnaði en ljóst er að eftir sem áður er nauðsynlegt er að halda vel á spöðunum og halda uppi öfluglu fræðslustarfi á árinu til að halda sama striki.

Lokaorð

Skýrslutæknifélag Íslands er nú 47 ára og á sér bæði langa og farsæla sögu sem þverfaglegt félag þeirra sem vilja hagnýta sér eða hafa áhuga á upplýsingatækni. Félagið heldur ráðstefnur, gefur út blaðið Tölvumál, starfrækir faghópa og rekur skrifstofu með einum starfsmanni. Óhætt er að fullyrða að félagið hefur haft umtalsverð áhrif á framþróun upplýsingatækninnar hér á landi. Starfsemin byggir að miklu leyti á ómældri sjálfböðavinnu stjórnarmanna, ritnefndar, orðanefndar og faghópa. Í félaginu starfar hæft fagfólk úr ýmsum greinum atvinnulífsins sem ekki telur eftir sér að undirbúa atburði félagsins, að ógleymdum fyrirlesurum. Stjórn Ský vill hér með þakka öllum þessum aðilum fyrir þeirra mikilvæga framlag við að efla starfsemi félagsins.

Framkvæmdastjóri félagsins á enn og aftur lof skilið fyrir það mikla starf sem hún hefur innt af hendi á árinu. Hún hefur sýnt mikla hæfileika í verkefnastjórn á stórum sem litlum viðburðum og er þeim kostum gædd að draga fram í dagsljósið allt það besta sem félagsmenn Ský og aðrir í upplýsingatækniheiminum hafa upp á að bjóða. Við teljum að félagið sé vel rekið og mun halda áfram af sama krafti á komandi starfsári.

Á síðasta aðalfundi urðu tvær breytingar á stjórn Ský. Ragnheiður Magnúsdóttir og Sigurður Friðrik Pétursson gáfu ekki kost á sér til áframhaldandi setu í stjórn og viljum við þakka þeim fyrir vel unnin störf á undanförunum árum.

Miklar breytingar verða á stjórn Ský að þessu sinni en Ólafur, Sigrún, Þorvarður og Guðmundur Arnar hafa öll ákveðið að gefa ekki kost á sér til áframhaldandi stjórnarsetu. Við þökkum Ólafi, Sigrúnu, Þorvarði og Guðmundi Arnari fyrir gott samstarf undanfarin ár og tökum með tilhlökkun á móti nýjum stjórnarmönnum. Sérstakar þakkir fær Sigrún en hún kom inn í stjórn Ský árið 2008 og varð þá strax varaformaður. Árið 2010 tók hún við formennsku í félaginu og sinnti henni til ársins 2014 þegar undirritaður tók við keflinu.

F.h. stjórnar Skýrslutæknifélags Íslands,
Guðjón Karl Arnarson, formaður.